


'sak fè, frè m'yo, jan Bondye fè nou wè li gen kè sansib pou nou an, se pou nou ofri tout kò nou ba li tankou ofrann bêt yo mete apa pou Bondye, bêt yo ofri tou vivan epi k'ap fè Bondye plezi. Se sèl jan nou dwe sèvi Bondye tout bon.



« Apre sa, Jezi di disip li yo: Si yon moun vle mache dèyè m', se pou li bliye tèt li. Se pou l' chaje kwa l' sou zepòl li, epi swiv mwen. Paske, moun ki ta vle sove lavi l' va pèdi li. Men, moun ki va pèdi lavi l' poutèt mwen, li va jwenn li ankò. Kisa sa ta sèvi yon moun pou l' ta genyen lemonn antye si l' pèdi lavi li? Kisa yon moun kapab bay pou l' gen lavi? (Matye 16: 24 - 26)

Tab de Matyè

Jan Kretyen Dwe Viv.....Paj 5

Kilès Ki Mèt ou?.....Paj 9

Remèsiman.....Paj 12

Bondye Se Youn Osinon Twa.....Paj 14

Ki Jou Jezi Te Krisifye.....Paj 19

Lapriyè.....Paj 24

Denominasyon.....Paj 30

1

Jan kretyen dwe viv.

Tankou nou toujou mande: èske pa ta sipoze genyen yon diferans ant jan you kretyen ap viv ak jan yon enkonvèti ap viv? Nou pa vle pale de peche men nou vle pale de enspirasyon, dezi kè moun nan osinon rezon ki fè moun nan aji yon jan. Byen souvan, nou wè ke pa genyen diferans ant dezi kretyen an ak dezi moun enkonvèti an. Pa egzanp, enkonvèti ap travay di pou li genyen sikse finansyèl; kretyen an ap travay pou menm rezon an tou. Nou jwenn enkonvèti ap chache genyen pouvwa nan monn lan; kretyen an ap fè menm bagay la tou. Wi, kretyen sipoze travay di; men èske sikse finansyèl ta sipoze objektiv prensipal yon kretyen?

Jezi di konsa:

*« Moun ki renmen papa l' osinon manman l' plis pase m' pa kapab moun pa m'.
Moun ki renmen ptit gason l' osinon ptit fi l' plis pase m' pa kapab moun pa m'.
Moun ki pa pran kwa l' pou l' swiv mwen, li pa kapab moun pa m' non plis. Moun
k'ap chache asire lavi l' va pèdi li. Men, moun ki va pèdi lavi l' poutèt mwen va
jwenn li ankò.» (Matye 10:37 - 39)*

Si Jezi di ke ou pa kapab renmen manman ou osinon papa ou plis pase li, sa vle di ke yon moun pa kapab renmen okenn moun osinon okenn bagay plis ke Jezi.

Nan Women 12 vèsè 1 ak 2, Pòl ekri:

*« Se sak fè, frè m' yo, jan Bondye fè nou wè li gen kè sansib pou nou an, se pou nou
ofri tout kò nou ba li tankou ofrann bêt yo mete apa pou Bondye, bêt yo ofri tou
vivan epi k'ap fè Bondye plezi. Se sèl jan nou dwe sèvi Bondye tout bon. Pa fè
menm bagay ak sa moun ap fè sou latè. Men, kite Bondye chanje lavi nou nèt lè la
fin chanje tout lide ki nan tèt nou. Lè sa a, n'a ka konprann sa Bondye vle, n'a
konnen sa ki byen, sa ki fè l' plezi, sa ki bon nèt ale. »*

Jezi te ofri tèt li kòm yon sakrifis pou nou te kapab jwenn padon pou peche nou. Kounye a, nou bezwen ofri tèt nou kòm yon sakrifis vivan pou Bondye. Pasaj la di ke se sèl jan nou dwe sèvi Bondye tout bon; **se pa youn nan jan yo, men se sèl jan sa a nou dwe sèvi Bondye.**

Lè yon moun ofri tèt yo kòm yon sakrifis vivan bay Bondye, sa vle di ke li bay vag ak dezi pa li

yo, li bay lavi li pou Bondye sèvi avèk li. Sa vle di ke si se nan maladi li pou Bondye jwenn glwa, li asepte; si se nan lanmò li pou travay Bondye a mache, li prêt pou bay lavi li. Li sèlman vle ke volonte Bondye fèt nan lavi li.

Sa se istwa lavi yon kretyen ki rele Jim Elliot. Mysye te fèt 8 oktòb 1927 nan lavil Portland epi li te asepte Jezi lè li te genyen 8 an. Lè misye nan ventèn li yo, li santi Bondye rele li pou li ale nan misyon nan Amerik laten. Li te genyen yon bon zanmi li ki rele Pete Fleming ki te devwe menm jan avèk li pou travay Bondye a ki deside ale nan misyon ansanm avèk li.

Le 4 fevriye 1952, mesye yo pran bato pou yo ale an ekwatè e yo te rive nan lavil Kito le 21 Fevriye. Yo pase 6 mwa nan lavil sa a ak yon fanmi misyonè pou yo te aprann pale panyòl pi byen. Fiyanse Jim (Elizabeth) ki te yon misyonè nan yon lòt zòn an ekwatè te vin wè mesye yo an Fevriye 1953 epi yo deside pou yo marye; konsa yo marye le 8 Oktòb 1953 nan lavil Kito. Yo vin genyen yon pitit fi (Valerie) ki te fèt 27 Fevriye 1955.

Dezi kè mesye yo, se te pou yo te pote Bòn Nouvèl la bay yon tribi yo te rele Auca. Gwoup moun sa yo pat konnen Bondye. Nan lang yo te pale a, pat genyen yon mo ki tradi Bondye. Pandan kèk mwa, mesye yo pase nan elikoptè, yo lage bagay pou moun sa pou yo te kapab montre moun sa yo ke yo vle zanmi yo. Men tribi sa a te sovaj anpil; yo pat genyen okenn rapò ak lòt moun ki an deyò tribi yo a.


Le 8 janvye 1956, yon gwoup nan tribi a te touye senk misyonè sa yo; ant yo menm, yo te kite 9 timoun san papa. Poukisa mesye yo te oblige bay lavi yo? Genyen yon fraz Jim te toujou renmen di ki se: « *Se yon moun ki pa sòt ki bay sa li pa kapab kenbe pou li kapab genyen sa li pa kapab pèdi* »

Mesye sa yo pat pèdi lavi yo paske yo te vle fè volonte Bondye.

Nan priyè Jezi te fè anvan yo te vin arete li pou yo al sakrifye li, Jezi te di:

« Papa, si ou vle, tanpri, wete gode soufrans sa a devan je mwen. Men, se pa volonte m' ki pou fèt, se volonte pa ou.»(Lik 22:42)

Se menm atitud sa a ke Bondye vle nan nou menm tou, pou nou mete volonte Bondye anvan dezi pa nou. Nou bezwen konprann tou ke **asepte Jezi pa koute nou anyen, men swiv Jezi ap koute nou yon bagay kanmèm**. An nou li nan Lik 5: 1-11:



Roger Youderian Pete Fleming Jim Elliot Nate Saint Ed McCully

Now, 50 years later, their sacrifice has resulted in reconciliation and transformation in the tribe. This story has inspired thousands to serve Christ...

« Yon jou, Jezi te bò kote letan Jenezarèt la; yon foul moun t'ap kwense l' toupatou pou tandé pawòl Bondye a. Li wè de kannòt bò rivaj la; pechè yo te desann atè, yo t'ap lave senn yo. Jezi moute nan yonn nan kannòt yo ki te pou Simon. Li mande l' pou l' vanse yon ti kras nan fon. Antan Jezi chita nan kannòt la, li t'ap moutre moun yo anpil bagay. Lè li fin pale, li di Simon konsa: Vanse kannòt la plis nan fon; jete senn ou pou peche. Simon reponn li: Mèt, nou pase tout nwit lan ap travay san nou pa pran anyen. Men, paske se ou ki di nou fè sa, nou pral lage senn lan. Yo lage senn lan; yo pran yon kantite pwason. Tèlman pwason yo te anpil, senn lan t'ap chire. Yo fè asosye yo ki te nan lòt kannòt la siy vin ede yo. Yo vini; de kannòt yo te sitèlman plen pwason, yo te prêt pou koule. Lè Simon Pyè wè sa, li lage kò l' nan pye Jezi, li di l' konsa: Mèt, pa rete kote mwen, paske mwen pa bon. Yon sèl sezisman te pran Simon ak tout mesye ki te avèk li yo lè yo wè kantite pwason yo te pran. Se te menm bagay la tou pou Jak ak Jan, de pitit Zebede yo, ki te asosye Simon. Lè sa a Jezi di Simon: Pa pè. Depi koulye a se moun ou pral peche. Yo mennen kannòt yo atè, yo kite tout bagay, y' ale avèk Jezi. »

Pa blyie ke mesye sa yo se nan pye travay yo ke yo te ye; pou yo te swiv Jezi, yo te kite tout pil pwason ke yo te kenbe yo. Anvan yon moun asepte Jezi, li genyen priyorite li, li genyen plan jan pou lavi li, li genyen bagay ke li ta renmen fè, li genyen yon wout lap swiv; men pou li swiv Jezi, li oblige swiv wout Jezi a. Anpil fwa wout Jezi a pa mennen menm kote ak wout ke moun nan tap swiv anvan an.

Si Pyè pat swiv Jezi, se yon pechè pwason ke li tap rete, men paske li asepte swiv Jezi, li pat kapab kontinye sou wout sa a. Sa pa vle di ke peche pwason pa bon, men pou li te kapab swiv Jezi, li pat kapab kontinye peche pwason ankò. Yon moun te gen dwa sou wout pou yo te vin yon gwo doktè, yon avoka, yon pwofesè, yon komèsan, yon bòs mason, yon moun kap travay tè, yon pè de fanmi, yon mè de fanmi, yon chofè kamyon, yon mizisyen anpi swiv Jezi chanje tout bagay sa yo.

Nan Matye 10, vèchè 18 a 22, nou li:

« Jezi wè li te nan mitan yon gwo foul moun. Li bay lòd pou yo janbe lòt bò lanmè a. Men, yon dirèktè lalwa pwoche bò kote l', li di l' konsa: **Mèt, m'ap swiv ou tout kote ou prale.** Jezi reponn li: Chat mawon gen twou yo. Zwezo k'ap vole nan syèl la gen nich yo. Men, Moun Bondye voye nan lachè a pa gen kote pou l' poze tèt li. Yon lòt nan disip yo di li: Mèt, pèmèt mwen al antere papa m' anvan. Men Jezi di li: **Swiv mwen. Kite moun mouri antere moun mouri yo.**»

Direktè lalwa a te vle swiv Jezi, men Jezi fè misye konprann si li vle swiv Jezi, lap oblige kite kay li, kabann li pou li dòmi deyò paske Jezi pat genyen kay ak kabann pou li te dòmi. Disip la menm te vle pran swen papa li ki gramoun epi aprè papa li mouri, lè sa a la vin swiv Jezi, men se pat sa ke Jezi te vle li menm.

E ou menm, èske wap chwazi pou ou kite dezi ou yo dèyè pou volonte Bondye kapab fèt nan lavi ou? Si dezi ke ou genyen ale kont sa ke Bondye vle pou ou a, kisa wap fè? Si rèv ou genyen pou lavi ou depi ou te timoun ale kont sa ke Bondye vle pou ou a, kisa wap chwazi pou ou fè?

Pòl ekri kretyen lavil Kolòs yo, li di:

« Nou menm ki deja leve soti vivan ansanm ak Kris la nan lanmò, se pou nou chache bagay ki anwo nan syèl la kote Kris la chita sou bò dwat Bondye. Pa kite bagay ki sou latè pran tèt nou, mete lide nou sou bagay ki anwo nan syèl la. Konnen sa byen: nou mouri deja, lavi nou kache ansanm ak Kris la nan Bondye. Se Kris la ki lavi nou tout bon. Lè la parèt, nou menm tou n'a parèt ansanm avè l' nan tout bèl pouvwa li. » (**Kolòs 3:1-4**)

Pi ba nan vèsè 17 la, li ekri

« Tou sa n'ap fè, tou sa n'ap di, fè l' nan non Seyè Jezi a, san nou pa janm bliye di Bondye mèsi nan li. »

Si nou ta pran yon fanmi kretyen pou nou ta poze yo kèk kesyon sou objektif fanmi yo, nap jwenn ke pa genyen diferans ant yo menm ak yon fanmi enkonvèti. Pa egzanp, fanmi kretyen an ta renmen pou pitit yo ale lekòl pou yo ta kapab sipòte yon fanmi pita. Yo ta renmen pou pitit yo genyen bon travay pou yo petèt ede paran yo lè paran yo vin gran moun. Genyen tou ki ta renmen wè pitit yo vwayaje ale nan peyi etranje pou yo kapab genyen yon pi bèl lavi. Tout bagay sa yo ke nou ekri la a, paran enkonvèti a ta renmen yo tou. Konsa, nou fini pa konprann ke pa genyen diferans nan dezi kè kèk kretyen an ak dezi kè yon moun enkonvèti.

Youn nan rezon ki fè sa, sè ke anpil kretyen asepte Jezi pou yo pa ale nan lanfè, men yo pa ofri tèt yo bay Jezi. Se pa Jezi ki chèf yo; se pa Jezi kap dirije lavi yo; se pa Jezi ki dezi kè yo; se pa Jezi ki priyorate nan lavi yo.

Kretyen an bezwen konprann ke se pa pou chans ki fè ke li nan pozisyon kote li ye a. Bondye genyen yon rezon ki fè ke se Ayisyen ke ou ye; Bondye genyen yon rezon ki fè ke se nan Riko osinon nan Brigue ke wap viv. Pandan ke wap panse ak jan ke lavi a pa bon pou ou, ou mete nan tèt ou ke si ou te genyen lajan, ou tap viv pi alèz. **Kwè mwen si ou vle, si ou pa satisfè ak yon (1) dola, pa konprann 1000 dola ap satisfè.**

2

Kilès ki mèt ou?

Nan Efèz 4:1, Pòl ekri:

“Se sa ki fè, mwen menm ki nan prizon poutèt Seyè a, m'ap mande nou pou nou viv yon jan ki konfòm ak jan Bondye te rele nou pou n' viv la.”

Anpil kretyen ap mennnen yon vi san kè kontan; genyen ladan yo ki genyen dekwa a viv, genyen tou ki nan bezwen. Genyen ki malad, konsa tou, genyen ladan yo ki an sante. Genyen ki santi ke se yon mari osinon yon madanm ki pou ta satisfè lavi yo, genyen tou, se mari osinon madanm yo ki tankou yon pwazon nan lavi yo.

Sa ke kretyen an pa reyalize, sè ke vi malere ke yap mennnen an se pa vi sa a ke Bondye vle pou yo. Mwen pa vle di ke Bondye vle ke tout kretyen dwe ap byen viv nan sans finansyèl yo, men sè ke kè kontan kretyenan pa depann sou valè lajan ke yo genyen, ni sou kòman sante yo ye. Nan Filip 4:4-6, Pòl ekri:

“Se pou nou toujou kontan nan lavi n'ap mennen ansanm nan Seyè a. M'ap repete l' ankò: Fè kè nou kontan anpil. Se pou tout moun konnen nou se moun ki gen bon kè. Seyè a ap vini anvan lontan. Pa bay kò nou traka pou anyen. Men, nan tout sikorans mande Bondye tou sa nou bezwen nan lapriyè. Toujou chonje di l' mèsi tou lè n'ap lapriyè.”

Nan vèsè 11 ak 12, Pòl kontinye:

“Si nou wè m'ap pale konsa, se pa paske koulye a mwen nan nesesite. Paske nan lavi, m' aprann kontante tèt mwen ak sa m' genyen. Mwen konnen sa ki rele viv nan mizè, mwen konnen sa ki rele viv nan richès. Kit mwen pa gen ase, kit mwen gen plis pase sa m' bezwen, nan tout sikorans m' aprann kontante tèt mwen toupatou ak sa mwen genyen.”

Pòl se te yon moun ki te rive konprann yon bagay ki enpòtan anpil. Sè ke kontantman li pat depann sou bagay materyèl ke li genyen. Gen de fwa li genyen plis ke sa li bezwen; gen de fwa tou, li pa genyen ase pou li viv. Men nan tout sikorans sa yo, li te kontante li avèk sa ke li genyen.

Jezi di nan Matye 6:25-26

“Se poutèt sa, mwen di nou: Pa bat kò nou pou sa nou bezwen pou manje ak bwè pou viv, ni pou rad nou bezwen pou mete sou kò nou. Eske lavi a pa pi konsekan pase manje? Eske kò a pa gen plis valè pase rad? Gade zwazo k'ap vole nan syèl la: yo pa plante, yo pa fè rekòt, yo pa sere anyen nan galata. Men, Papa nou ki nan syèl la ba yo manje. Eske nou pa vo pi plis pase zwazo yo?”

Pasaj la kòmanse ak: “***Se poutèt sa***”

Kesyon nou ta vle poze, se poutèt kisa? Poukisa ke nou pa bezwen bat kò nou pou sa ke nou bezwen? Nap bezwen li vèsè avan yo pou nou wè poukisa pou nou pa bay tèt nou pwoblèm pou bezwen nou yo. Nan vèsè 24 la, Jezi di:

“Pèsonn pa ka sèvi byen ak de mèt an menm tan. Li gen pou l' rayi yonn si l' renmen lòt la. L'ap sèvi byen ak yonn, men l'ap meprize lòt la. Nou pa kapab sèvi Bondye ak lajan an menm tan.”

Pou ou pa enkyete ou pou bezwen materyèl ke ou genyen, lap depann sou kilès ki mèt ou. Si se Bondye ki mèt ou, ou pa genyen pwoblèm; men si se lajan ki mèt ou, ou genyen gwo pwoblèm. Malerezman, anpil moun pa reyalize ke se lajan ki mèt yo, yo pa konprann ke lajan genyen kontwòl lavi yo.

Ki kalite moun ke lajan se mèt yo?

Yon moun gen dwa genyen anpil lajan epi lajan se mèt li; konsa tou yon moun gen dwa pa genyen mwayen lajan epi lajan se mèt li. Li pa fè diferans si ou genyen lajan osinon si ou pa genyen lajan, lajan kapab vin mèt ou. Ou kapab esklav lajan ke ou rich osinon razè.

Relasyon esklav ak mèt li.

Yon esklav sou lòd mèt li. Sa mèt li di li fè, se sa pou li fè. Lavi yon esklav depann sou dezi mèt li; konsa esklav la pa genyen kontwòl lavi li, se mèt la ki kontwole lavi esklav la. Pou ou konnen ki kontwòl ke lajan genyen sou ou, eseye poze tèt ou kèk kesyon:

- Si mwen te genyen pi plis lajan ke mwen genyen kounye a, èske kè mwen pa tap genyen yon pi bèl lavi ak kè kontan?
- Si mwen te genyen pi plis lajan ke mwen genyen kounye a, èske mwen pa tap rive fè plis travay pou Bondye?
- Si mwen te genyen pi plis lajan ke mwen genyen kounye a, èske moun pa tap banm respè ke mwen dezire a?
- Si mwen te genyen pi plis lajan ke mwen genyen kounye a, èske mwen pa tap rive fè sa mwen pi pito?

Repons ou ak kesyon sa yo montre ou ki kontwòl ke lajan genyen sou ou. Si ou panse ke plis lajan kapab ba ou kè kontan osinon jwenn respè nan men moun osinon wap kapab fè plis travay pou Bondye, ou twonpe ou. Sa montre ke se lajan ki mèt ou; ou depann sou lajan pou bagay ki pi enpòtan nan lavi ou. Sa ap lakòz anpil pwoblèm nan lavi ou.

Si ou depann sou lajan pou ou genyen kè kontan, kontantman an pap dire pou lontan. Poukisa ke nou jwenn anpil moun rich konn tèlman pa genyen kè kontan, yo konn rive fè tèt yo mal. Genyen bagay ke yo bezwen nan lavi yo, lajan pa kapab ba yo li. Lajan kapab fè ou wè pi gwo doktè nan lemonn, men li pa kapab ba ou lasante. Avèk lajan, ou kapab achte matla ki pi dous la, men ou pa kapab achte senk minit dòmi paske genyen moun ki genyen lajan men yo pa kapab dòmi nan kabann yo.

Anpil fwa, genyen moun ki di ou bezwen lajan pou travay Bondye a; yo panse ke si pa genyen lajan travay Bondye a pa kapab fèt, men se pa vre. Pou travay Bondye a fèt, sèl sa ou bezwen se Bondye, ou pa bezwen anyen ankò. Bondye li menm ap bay bagay materyèl ki nesesè pou travay li fèt.

3

Remèsiman

“Di Bondye mèsi pou tout bagay. Se sa Bondye mande nou, nou menm ki mete konfyans nou nan Jezikri.” (1 Tesalonik 5:18)

Pòl kòmande kretyen Tesalonik yo pou yo di Bondye mèsi pou tout bagay; li pa di pou kèk bagay, men li di pou **tout** bagay. Sa vle di lè ke ou santi bagay la bon pou ou osinon ou santi li pa bon pou ou, ou bezwen di Bondye mèsi. Sa vle di ke ou bezwen di Bondye mèsi lè pitit ou malad epi ou pa genyen mwayen pou ou mennen timoun nan lopital. Sa vle di ke ou bezwen di Bondye mèsi lè ke mari ou osinon madanm ou fè lavi a di pou ou. Li fasil pou ou remèsyé Bondye lè ke bagay yo bon, men li diferan lè bagay yo pa jan ke ou vle li a.

Kesyon ke anpil nan nou kapab poze se: “ Pou ki rezon pou mwen di Bondye mèsi nan move sikontans yo? ”

Genyen anpil rezon pou nou fè sa ke Pòl di pou nou fè la a. Nou ta gen dwa di ke obeyi pawòl Bondye a se sa ki genyen plis enpòtans lan men genyen lòt rezon ki pi pratik ki fè ke Pòl mande pou nou di Bondye mèsi pou tout bagay.

- a) Sa motive nou pou nou wè plan Bondye nan tout sikontans yo.
- b) Sa ede nou pou nou soumèt nou anba volonte Bondye.
- c) Sa ede nou sonje ke nou depann sou Bondye pou tout bagay.
- d) Sa fè nou genyen plis konfyans nan Bondye.
- e) Sa retire pèrèz ak move panse.
- f) Sa ede nou fikse je nou sou Bondye e pou nou pa gade sou sikontans yo.
- g) Sa ba nou plis kè kontan ak enèji.

Bagay sa yo se rezulta lè ke ou di Bondye mèsi pou tout bagay. Men pou ou rive nan pwen pou di Bondye mèsi ak tout kè ou nan move sikontans yo, genyen kèk bagay ou bezwen konprann. Nan **Sòn 103:19**, nou li:

“Seyè a mete fotèy li anwo nan syèl la, l'ap gouvènen tout bagay.”

Bondye ap gouvènen tout bagay; tout bagay anba kontwòl Bondye. Pa genyen anyen ki kapab rive ki pa anba kontwòl Bondye; konsa, lavi kretyen an an sekirite. Nou pa bezwen twouble lè ke bagay yo pap mache jan ke nou ta vle li a, paske Bondye ap kontwole tout bagay. Anplis nan Women 8:28, nou li:

“Nous savons, du reste, que toutes choses concourent au bien de ceux qui aiment Dieu, de ceux qui sont appelés selon son dessein.”

“Tansèlman, nou konn sa byen: nan tout bagay, Bondye ap travay pou byen tout moun ki renmen l', pou byen tout moun li te fè lide rele.”

Sa ke vèsè a fè nou konnen sè ke tout bagay ki rive nan lavi ou, Bondye ap fè yo sèvi kòm yon byen pou ou. Genyen anpil bagay ki rive nan lavi ou, se pa Bondye ki fè yo rive, men Bondye kapab fè yo sèvi yon byen pou ou. Si nou ta pran egzanz lavi Jozèf ki kòmanse nan Jenèz 37.

Jozèf te genyen disetan (17 an) lè ke frè li yo te tèlman rayi li, yo te lage li nan yon pi; apre sa yo vann li kòm esklav. Lè li rive an Ejip, madan Potifa akize li, yo jete misye nan prison; men Bondye te toujou an kontwòl. Nan Jenèz 41, nou jwenn ke Jozèf te vin an dezyèm pozisyon nan wayòm farawon an.

Lè frè Jozèf yo te oblige vini an Ejip pou yo te vin achte manje paske te genyen yon gwo mizè, yo te kontre avèk Jozèf. Nan Jenèz 45: 4-8, nou li:

« Jozèf di frè l' yo: -Pwoche vin pi pre m'. Yo pwoche, li di yo: -Se mwen menm Jozèf wi, frè nou an. Se mwen menm wi nou te vann bay moun ki tapral peyi Lejip la. Men koulye a, nou pa bezwen boulvèse. Nou pa bezwen règrèt nou te vann mwen pou yo mennen m' isit la. Se Bondye ki te voye m' devan pou m' te ka sove lavi nou. Sa fè dezan depi grangou tonbe sou peyi a. Men, p'ap gen mwayen travay latè ni fè rekòt pou senk lanne ankò. Bondye te voye m' vini devan pou ras nou an pa t' fini nan peyi a, pou m' te ka sove lavi nou, pou nou pa mouri. Nou wè. Se pa nou menm ki te voye m' isit la, men se Bondye. Se Bondye menm ki mete m' sèvi yon papa pou farawon an. Mwen se chèf nan tout kay li, se mwen k'ap gouvènen tout peyi Lejip la. »

Sa ke pasaj la montre nou, sè ke Bondye ap kontwole tout bagay; nenpòt sa ki rive nan lavi ou pa rive pou chans. **Konsa, pa ezite remèsyé Bondye nan tout sitiyasyon yo.**

4

Bondye se youn osinon twa?

Genyen yon sèl Bondye.

Nan **1 Korent 8:6**, nou li:

« *Se yon sèl Bondye a ki genyen: se Papa a ki kreye tout bagay epi se pou li n'ap viv. Pou nou menm, se yon sèl Mèt ki genyen: se Jezikri, se nan li tout bagay soti, se li k'ap fè nou viv tou.* »

Nan **1 Timote 2:5**, nou li:

« *Se yon sèl Bondye a ki genyen. Se yon sèl moun tou ki mete lèzòm dakò ak Bondye ankò, se Jezi, Kris la.* »

Genyen anpil konfizyon sou sijè sa a paske chak denominasyon anseye l nan jan pa yo. Pa genyen konfizyon nan sa ke Bib la anseye. Nou gen dwa pa konprann yon bagay osinon Bib la gen dwa pa bay ase detay sou yon sijè. Lè konsa, nou bezwen aprann di ke nou pa konnen, men nou pa dwe ap repeete yon bagay ke nou pa konprann tout bon epi nou pa menm kapab rive eslike sa ke nou kwè a.

Si nou ta pran kòm egzanp Temwen Jerova yo; yo anseye ke Jezi pa Bondye. Pou yo kapab sipòte opinyon yo an, yo oblige chanje kèk vèsè nan vèsyon Bib yo an ki pou apiye sa ke yap anseye a. Sa se travay satanik. Ou pa kapab chanje sa ki ekri nan Bib la pou ou kapab montre ke ou genyen rezon nan sa ke ou kwè a.

Nou aprann ke genyen yon sèl Bondye. Se sa ke Bib la anseye. Nou aprann tou ke Jezi se Bondye. Wi Bib la montre nou sa tou.

Men, si Jezi se Bondye ke li ye, avèk kilès ke Li tap priye lè Li te nan jaden an? Nan **Lik 22: 41 a 42**, nou li:

« *Epi li kite yo, li al pi devan, distans yon moun kab voye yon wòch konsa. Li mete ajenou, li pran lapriyè. Li di: Papa, si ou vle, tanpri, wete gode soufrans sa a devan je mwen. Men, se pa volonte m' ki pou fèt, se volonte pa ou.* »

Ankò lè Jezi te sou kwa a nan **Lik 23:46**, nou li:

« *Jezi rele byen fò, li di: Papa, m' ap renmèt lespri mwen nan men ou. Apre l' fin di pawòl sa yo, li mouri.* »

Nou wè ke Li tap pale ak Papa a ki se Bondye. Konsa, malgre ke Bib la di ke Bondye se yon sèl, nou wè ke Jezi ki se Bondye tap pale ak Papa a ki se Bondye; kouman nou kapab esplike bagay sa a?

An nou koumanse nan premye vèsè ki nan premye liv nan Bib la. Nan **Jenèz 1:1**, nou li:

« *Nan konmansman, Bondye kreye syèl la ak latè a.* »

Lè nou analize mo ebre ke yo tradi kòm Bondye nan vèsè sa a, se "Elohim". Nan lang ebre a, Bondye se "El"; "Elohim" se pliryèl "El". Sa ki enteresan, vèb "kreye" ki vini apre "Elohim" nan an sengilye li menm. sa vle di ke vèb ki swiv mo pliryel la, li an sengilye.

Genyen etidyan la Bib ki di ke rezon ki fè ke otè liv Jenèz la mete Bondye an pliryel, se te pou montre grandè Bondye, pouvwa osinon pwisans Bondye; men mwen pa kwè sa.

An nou gade nan **Ezayi 6: 8**, nou li:

« *Apre sa, mwen tande Seyè a ki t'ap di: -Kilès mwen ta voye la a? Kilès ki ta asepte ale pou nou?* »

Nan **Jenèz 1:26**, nou li:

« *Bondye di ankò. Ann fè moun. N'ap fè l' pòtre ak nou, pou li sanble ak nou.* »

Si wap prete atansyon, wap wè ke genyen plis ke yon sèl moun la a. Lè Bondye di: **N'ap** fè moun pòtre ak **nou**", nou kapab wè ke genyen plis ke youn la a. an nou konpare pasaj sa a ak **Jan 1: 1** ki di konsa:

« *Anvan Bondye te kreye anyen, Pawòl la te la. Pawòl la te avèk Bondye. Sa Bondye te ye, se sa Pawòl la te ye tou.* »

Nan lang fransè a, nou li:

« *Au commencement était la Parole, et la Parole était avec Dieu, et la Parole était Dieu.* »

Pawòl la te avèk Bondye e Pawòl la te Bondye. Kilès ki Pawòl la? se Jezi; sa vle di ke nan kòmansman an, Jezi te avèk Bondye e Jezi te Bondye.

Genyen de (2) mo nan lang ebre a ki enpòtan pou nou konprann sijè sa a. Premye mo se « *Echad* »; dezyèm mo a se « *Yachid* ». Konfizyon ki genyen an, sè ke toulède mo sa yo vle di « *youn* » osinon « *yon sèl* », men yo pa anplwaye menm jan.

Echad

« *Echad* » vle di youn men se pa nan sans konte 1, 2, 3,... etc, men se youn tankou yon inyon, yon tèt ansanm. Egzanp: nan **Jenèz 2: 24**, nou li:

« *Se poutèt sa, gason an va kite papa l' ak manman l' pou l' mete tèt li ansanm ak madanm li, pou tout de fè *yon sèl*.* ».

Yon sèl sa a pa vle di yon grenn moun, men se inyon ki genyen nan yo ki fè ke yo se yon sèl la.

Nan **Jenèz 11: 6**, nou li:

« *Epi li di. Koulye a, gade! Yo tout fè *yon sèl* pèp. Yo tout yo pale yon sèl lang. Gade sa yo konmanse ap fè. Talè konsa y'ap pare pou yo fè sa yo vle..»*

Yachid

« *Yachid* » vle di youn nan sans konte 1, 2, 3...etc.

Nan **Jenèz 2:2**, nou li:

« *Bondye di l': -Pran Izarak, ptit ou a, sèl ptit gason ou genyen an, ptit ou renmen anpil la. Ale nan peyi Morija, w'a moute sou tèt mòn mwen pral moutre ou la. Lè w'a rive la, w'a touye l'. Apre sa, w'a boule l' nèt pou mwen.* »

Nan **Zakari 12:10**, nou li:

« *M'a fè ptit ptit David yo ak moun lavil Jerizalèm yo gen bon kè. M'a fè yo konn lapriyè nan pye m'. Y'a leve je yo gade m', y'a wè moun yo te pèse a. Y'a nan gwo lapenn pou li tankou moun ki pèdi sèl ptit li te genyen an. Y'a pete rele tankou moun ki pèdi premye ptit gason yo.* »

Nan reliydon Jidayis la, genyen yon pasaj ki kle pou yo e yo rele pasaj la « Shema ». Pasaj la se **Deteronòm 6:4**; se yon pasaj ke yo toujou ap repete nan sèvis yo.

Shema

Ebre: שְׁמַע יִשְׂרָאֵל יְהוָה נָאָתָה אֶחָד

Ki li konsa: Shema Yisrael Adonai Eloheinu Adonai Echad

Anglè: Hear, O Israel! The LORD is our God! The LORD is One!

Fransè: Écoute, Israël! l'Éternel, notre Dieu, est le seul Éternel

Kreyòl: Koute byen, nou menm pep Izrayèl! Seyè a, Bondye nou an, se li ki sèl mèt.

An nou gade jan chak mo yo tradi literalman:

- **Shema** — « koute » osinon « tandé » mo sa a montrenon sèlman tandem men konpreyansyon tou.
- **Yisrael** — « Izrayèl » nan sans pèp Izrayèl la.
- **Adonai** — « Letènèl » se mo sa ke itilize pi plis pou Adonai
- **Eloheinu** — « Bondye nou an » ki an pliryèl
- **Echad** — « Yon sèl » osinon « youn »

Nan lang grèk ke nouveau testaman an ekri, nou jwenn de mo ki se: « **Hen** » ak « **Monos** ». « **Hen** » menm jan ak « **Echad** » nan lang ebre a vle di youn an tan ke yon inyon. « **Monos** » menm jan ak « **Yachid** » nan lang ebre a vle di youn nimerik tankou 1 olye de 2.

Hen

Nou jwenn mo « Hen » lan nan **Jan 10:30** ki di:

«Mwen menm ak Papa m', nou fè yon sèl.»

Nou jwenn li ankò nan **Matye 19:5** ki di:

« Apre sa li di: Se poutèt sa, gason an va kite papa l' ak manman l' pou l' mete tèt li ansanm ak madanm li. Yo tou de va fè yon sèl kò. »

Nou jwenn li ankò nan **Galat 3:20** ki di:

« Or, le médiateur n'est pas médiateur d'un seul, tandis que Dieu est un seul »

« Lè yon moun pou kont li, li pa bezwen entèmedyè. Bondye pou kont li. »

Nan **Mak 12:29**, nou jwenn Jezi repete « Shema » a ke tout moun pèp Izrayèl la te konnen.

Monos

Nou jwenn mo « Monos » lan nan **Matye 24:36** ki di:

« *Men, pesonn pa konnen ni ki jou, ni ki lè sa va rive, pa menm zanj yo ki nan syèl la, pa menm Ptit la. Sèl Papa a konn sa.* »

*Nou jwenn li ankò nan **Galat 3:20** ki di:*

« *Se poutèt sa, ann chante, ann fè lwanj pou li pou tout tan, li menm ki sèl Bondye nou pa ka wè a, Wa ki la pou tout tan an epi ki p'ap janm mouri a. Amèn.* »

Pa genyen moun ki kapab diskite ke Papa a se Bondye men nou jwenn moun ki pa dakò ke ni pitit la, Jezi, ni Sentespri pa Bondye. Si Papa a rele pitit la Bondye, kouman pou yon moun pa dakò ak sa. Nan **Ebre 1: 5 a 8**, nou li:

« *Kilès nan zanj yo Bondye te janm di: Ou se pitit mwen. Depi jòdi a se mwen ki papa ou? Li pa janm di okenn nan zanj li yo: M'a yon papa pou li. La yon pitit pou mwen. Men, lè Bondye t'ap voye premye Ptit li a sou latè, li te di: Se pou tout zanj Bondye yo adore li. Lè l' t'ap pale sou zanj li yo, li te di: Bondye fè zanj li yo tounen van. Li fè sèvitè l' yo tounen flanm dife. Men, lè l'ap pale sou Ptit li a, li di: O Bondye, gouvènman ou lan la pou tout tan. W'ap gouvènen san patipri tankou yon wa nan peyi ou la.* »

Nan liv travay, nou jwenn Pyè rele Sentespri Bondye lè Ananyas te bay manti sou zafè lajan tè li te vann nan. Nan Travay 5:3 a 4, nou li:

« *Lè sa a, Pyè di li: Ananyas, ki jan ou fè kite Satan antre nan kè ou pou l' fè ou bay Sentespri manti, pou l' fè ou kenbe enpe nan lajan tè a pou ou? Anvan ou te vann tè a, se pa pou ou li te ye? Apre ou te fin vann li, tout lajan an te pou ou, pa vre? Ki jan ou fè mete nan tèt ou pou fè yon bagay konsa? Se pa moun ou bay manti non. Se Bondye ou twonpe.* »

Pou fini, nap di ke Papa a se Bondye, Ptit la se Bondye, Sentespri se Bondye; Ansanm, yo se yon sèl (Echad, Hen) Bondye.

5

Ki jou Jezi te krisifye?

Nan **Matye 12:40**, Jezi di:

« *Menm jan Jonas te pase twa jou twa nwit nan vant gwo pwason an, konsa tou Moun Bondye voye nan lachè a gen pou pase twa jou twa nwit anba tè.* »

Nan **Mak 8:31**, nou li:

« *Apre sa, li (Jezi) kòmanse di disip li yo yon bann bagay. Li di yo konsa: -Mwen menm, Moun Bondye voye nan lachè a, mwen gen pou m' soufri anpil. Chèf fanmi yo, chèf prèt yo, dirèktè lalwa yo, yo yonn p'ap vle wè mwen. Y'ap fè touye m'. Men sou twa jou, mwen gen pou m' leve soti vivan pami mò yo.* »

Nou kapab li nan **Mak 9:31, Mak 10:34** ki pale de menm bagay la. Bib la di klèman ke Jezi ap leve twa jou aprè lanmò li. Men si Jezi te mouri nan Vandredi epi li leve nan Dimanch, nou pa wè twa jou ak twa nwit lan. Bib la pa genyen manti ladan li, konsa an nou gade kisa ki kreye pwoblèm nan.

Premyèman, nou jwenn ke nan premye jou nan semèn nan ke yo te jwenn tonm lan vid epi Jezi te parèt sou chemen medam yo ki tap sòti nan tonm lan (**Matye 28: 1-8, Lik 24, Jan 20**). Konsa, si Jezi leve nan premye jou nan semèn nan ki se **Dimanch**, sa vle di ke fòk Li ta mouri nan **Jedi** pou sa ta bay twa jou ak twa nwit.

Nou jwenn ke Jezi te mouri lavèy jou saba a. Nan **Lik 23:50-56**, nou li:

« *Te gen yon jwif ki te rele Jozèf, moun livil Arimate. Se te yon bon gason ki te mache dwat devan Bondye. Li t'ap tann kilè Bondye t'ap vin pran pouvwa a nan men li. Li te fè pati Gran Konsèy jwif yo, men li pa t' dakò ak sa lòt yo te fè ni ak sa yo te deside. Jozèf al lakay Pilat, li mande kò Jezi. Apre sa, li al desann kò a sou kwa a, li vlope l' nan yon bél dra blan, epi li mete l' nan yon kavo yo te fouye nan*

wòch. Se te yon kavo tou nèf: yo pa t' ankò janm mete pesonn ladan li. Se te yon jou vandredi, repo a tapral kòmanse. Medam ki t'ap mache avèk Jezi depi nan peyi Galile yo te ale ansanm ak Jozèf. Yo wè kavo a, yo wè ki jan yo te mete kò Jezi ladan li. Apre sa, yo tounen lakay yo, y' al pare lwil santi bon ak odè pou benyen kò a. Men, jou repo a yo pa t'fè anyen, jan lalwa Moyiz te vle l' la. »

Pasaj ke nou li la a, se youn nan pasaj nou kapab pran egzanp kòm fot nan jan ke yo tradi pasaj la. Nan tèks original la, li pa di ke se te yon jou **Vandredi**, li di ke se te jou **préparasyon an**; sa vle di jou pou yo fè préparasyon pou jou saba a ke yo te rele jou repo a tou, paske yo pat gen dwa fè okenn travay nan jou saba a. Li vrèman enpòtan pou nou konprann ke pa genyen mo «vandredi» a nan lang oriinal la.

Nan tradiksyon Fransè a, nou li:

« Il y avait un conseiller, nommé Joseph, homme bon et juste, qui n'avait point participé à la décision et aux actes des autres; il était d'Arimathée, ville des Juifs, et il attendait le royaume de Dieu. Cet homme se rendit vers Pilate, et demanda le corps de Jésus. Il le descendit de la croix, l'enveloppa d'un linceul, et le déposa dans un sépulcre taillé dans le roc, où personne n'avait encore été mis. C'était le jour de la préparation, et le sabbat allait commencer. Les femmes qui étaient venues de la Galilée avec Jésus accompagnèrent Joseph, virent le sépulcre et la manière dont le corps de Jésus y fut déposé, et, s'en étant retournées, elles préparèrent des aromates et des parfums. Puis elles se reposèrent le jour du sabbat, selon la loi. »

Pasaj la montre nou ke Jezi mouri jou anvan Saba a, ki se jou repo a. Kounye a, kesyon ke nou ta vle poze, se:

Ki jou ki jou Saba a?

Nan **Egzòd 31:14-16**, nou li:

« Se poutèt sa, se pou nou respekte jou repo a paske se yon jou pou nou mete apa pou mwen. Si yon moun pa respekte jou sa a, se pou yo touye l'. Si yon moun fè nenpòt ki travay jou sa a, se pou yo disparèt li nan mitan pèp li a. N'a fè tout travay nou pandan sis jou. Men setyèm jou a, se va yon gwo jou repo, jou n'a mete apa pou Seyè a. Nenpòt moun ki fè nenpòt ki travay jou sa a, se pou yo touye l'. Se tout pèp la nèt ki pou respekte jou repo a de pitit an pitit. Se yon kontra ki la pou tout tan. »

Dapre pasaj sa a ak anpil lòt pasaj ankò, jou Saba a se setyèm jou a, ki se samdi. An nou gade yon lòt pasaj ki montre jou ki pa jou Samdi a. Se **Levitik 23:23 a 44** ki di:

« Seyè a pale ak Moyiz, li di l' konsa: Pale ak moun pèp Izrayèl yo. Men sa pou ou di yo: **Premye jou setyèm mwa a va yon gwo jou repo pou nou.** Jou sa a n'a kònen twonpèt pou fè moun yo chonje se jou pou yo reyini pou adore Bondye. Piga nou fè gwo travay. N'a fè ofrann pou yo boule nan dife pou Seyè a.

Seyè a pale ak Moyiz, li di l': **Dizyèm jou sètyèm mwa sa a**, se gran jou padon an li ye. N'a reyini tout moun pou n' adore Bondye. N'a fè jèn epi n'a fè ofrann pou yo boule nan dife devan Seyè a. Jou sa a, nou p'ap travay menm, paske se gran jou padon an, jou pou nou fè sèvis pou Seyè a, Bondye nou an, pou nou mande l' fè nou gras. Si yon moun mete anyen nan bouch li jou sa a, y'ap wete l' nan mitan pèp li a. Si yon moun travay jou sa a, se mwen menm, Seyè a, k'ap touye l'. Nou pa pou fè anyen jou sa a. Sa se regleman pou nou swiv tout tan, de pitit an pitit, kote nou pase. **Se va yon gwo jou repo**, jou nou p'ap fè ankenn travay. Depi lè sole� kouche nan nevyèm jou mwa a jouk lè li kouche ankò dizyèm jou a, n'a rete san manje.

Seyè a pale ak Moyiz, li di l': Pale ak moun pèp Izrayèl yo, w'a di yo konsa: N'a fete fèt joupa yo pandan sèt jou. N'a konmanse sou **kenzyèm jou setyèm mwa a**. Premye jou a, n'a reyini tout moun pou adore Bondye. **Pesonn p'ap fè gwo travay jou sa a**. Chak jou, pandan sèt jou, n'a boule ofrann nan dife pou Seyè a. Sou wityèm jou a, n'a reyini moun yo ankò pou adore Bondye, epi n'a boule ofrann nan dife pou Seyè a. Se va yon jou pou adore Bondye. Jou sa a, piga nou fè gwo travay.

Men fèt pou nou fete pou Seyè a. Men jou n'a reyini tout moun pou yo fè sèvis pou Bondye. Men ofrann pou nou boule nan dife pou Seyè a, se ka bèt pou nou boule nèt, se ka ofrann grenn jaden, se ka bèt pou nou touye, se ka ofrann diven. Chak jou fèt gen ofrann pa li. **Apa tout jou repo Seyè yo, n'a fete fèt sa yo tou.** Apa kado pou nou fè nòmalman, apa ofrann n'ap fè paske nou te fè ve, apa ofrann n'ap fè pou Seyè a paske nou te vle fè l', n'a fè ofrann sa yo.

Sou **kenzyèm jou setyèm mwa a**, n'a fè fèt pou Seyè a pandan sèt jou, apre n'a fin rekòlte jaden nou yo. **Premye jou a ak wityèm jou a va de gwo jou repo.** Premye jou a, n'a keyi pi bon fwi nan pye sitwon nou yo, n'a koupe fèy nan pye dat nou yo ak branch nan pye jasmen ak pye sikren, n'a fè kè nou kontan devan Seyè a, Bondye nou an, pandan sèt jou.

Chak lanne, pandan sèt jou nan setyèm mwa a, n'a fete fèt sa a pou mwen menm, Seyè a, Bondye nou an. Sa se yon regleman pou nou swiv tout tan, de pitit an pitit. Pandan sèt jou tout moun pèp Izrayèl yo va rete anba joupa. Wi, n'a rete anba joupa pandan sèt jou. Konsa, pitit pitit nou yo va konnen mwen menm, Seyè a, mwen te fè pèp Izrayèl rete anba joupa lè mwen te fè yo soti kite peyi Lejip la. Se mwen menm ki Seyè a, Bondye nou an!

Se konsa Moyiz te bay moun pèp Izrayèl yo tout kalite fèt pou yo fete pou Seyè a. »

***kalandrye Izrayel la

Non	Ane defisyen	Ane regilye	Ane komplè	Koresponn
Tishri	30	30	30	Septanm - Oktòb
Heshvan	29	29	30	Oktòb - Novanm
Kislev	29	30	30	Novanm-Desanm
Tevet	29	29	29	Desanm - Janvye
Shevat	30	30	30	Janvye - Fevriye
Adar I	30	30	30	Fevriye - Mas
Adar II	29	29	29	Fevriye - Mas
Nisan	30	30	30	Mas - Avril
Iyar	29	29	29	Avril - Me
Sivan	30	30	30	Me -Jen
Tammuz	29	29	29	Jen - Jiyè
Av	30	30	30	Jiyè - Out
Elul	29	29	29	Out - Septanm
Total:	353 or 383	354 or 384	355 or 385	

The month Adar I is only present in leap years. In non-leap years Adar II is simply called "Adar."

Nou kapab wè ke jou Saba pa vle di jou Samdi paske jou gwo fèt sa yo, se te Saba ke yo te ye tou. Kounye a, an nou gade nan **Jan 19:31-33** ki di:

« Se te lavèy jou repo a. Jwif yo pa t' vle pou kadav yo te rete sou kwa yo pandan jou repo a, paske jou repo a te yon gwo jou fèt. Yo mande Pilat pou fè kraze janm moun ki te kloure sou kwa yo, lèfini pou l' te fè wete kadav yo. Se lè sa a, sòlda yo vini, yo kraze janm premye nonm yo te kloure sou kwa menm lè ak Jezi a. Apre sa, yo kraze janm dezyèm lan tou. Men, lè yo rive sou Jezi, yo wè li te gen tan mouri. Se sak fè yo pa t' kraze janm li yo. »

« Dans la crainte que les corps ne restassent sur la croix pendant le sabbat, -car c'était la préparation, et ce jour de sabbat était un grand jour, -les Juifs demandèrent à Pilate qu'on rompit les jambes aux crucifiés, et qu'on les enlevât. »

Dapre vèsè sa a, nou kapab wè ke jou Saba sa a se te yon jou espesyal, se te yon gwo jou fèt. Sa vle di ke jou Saba sa a pat nesesèman yon Samdi, men se te youn nan jou ke Bondye te mande pou yo te obsève tankou yon jou repo.

Nan Mak 15: 6 a 7, nou li:

« Pou chak fèt Delivrans Pilat te konn lage yon prizonye. Se pèp la ki te konn chwazi kilès. Te gen yon nom yo rele Barabas; li te nan prizon ansanm ak kèk lòt ki t'ap konplete avèk li. Yo te nan prizon poutèt yon nom yo te touye yon jou yo te pran lezam kont gouvenman an. »

« A chaque fête, il relâchait un prisonnier, celui que demandait la foule. Il y avait en prison un nommé Barabbas avec ses complices, pour un meurtre qu'ils avaient commis dans une révolte. »

***7/4/2012 : Samdi; 26/3/2011: Madi; 15/4/2014: Madi; 4/4/2015:Samdi

Ebre	Transliteration	Kreyòl
יום ראשון	Yom Rishon	Premye Jou (Dimanch)
יום שני	Yom Sheini	Dezyèm Jou (Lendi)
יום שלישי	Yom Shlishi	Twazyèm Jou (Madi)
יום רביעי	Yom R've'i	Katriyèm Jou (Mèkredi)
יום חמישי	Yom Chamishi	Senkyèm Jou (Jedi)
יום שישי	Yom Shishi	Sizyèm Jou (Vandredi)
יום שבת	Yom Shabbat	Jou Repo - Saba (Samdi)

6

Lapriyè

Lapriyè se youn nan bagay ke anpil moun neglige epi se youn nan bagay ke anpil moun pa pratike jan ke Bib la anseye li. Anpil fwa, lè ou montre yon moun jan ke Bib la mande pou ou priye, moun nan kontinye jan li te konn fè anvan an. An nou gade jan ke Jezi anseye nou pou nou priye nan **Matye 6:5-8:**

« Lè n'ap lapriyè, pa fè tankou ipokrit yo ki renmen kanpe nan mitan sinagòg ak nan pwent kalfou pou yo lapriyè. Yo fè sa pou moun kapab wè yo. Sa m'ap di nou la a, se vre wi: Konsa, yo tou jwenn rekonzans yo Men ou menm, lè w'ap lapriyè, antre nan chanm ou. Fèmen pòt ou. Lapriyè Papa ou ki la pou kont li avè ou. Konsa, Papa ou menm ki wè sa ou fè an sekèr a, se li ki va ba ou rekonzans ou. Lè w'ap lapriyè, pa plede repete yon bann pawòl pou gremesi. Se konsa moun lòt nasyon yo fè. Yo mete nan tèt yo Bondye va tandem yo si yo pale anpil. Piga nou fè tankou moun sa yo. Paske, Papa nou tou konnen sa nou bezwen anvan menm nou mande li. »

Priyè prive

Nou wè ke Jezi mete anpil enpòtans sou priyè an prive. Jezi di pou ou antre nan chanm ou, fèmen pòt ou pou ou lapriyè. Lè ke ou fè li konsa, pa genyen lòt moun ki kapab tandem ou, konsa ou kapab sensè devan Bondye, se pa yon cho ke wap bay; se zafè ant ou menm ak Papa ou ki anro nan syèl la. Non sèlm Jezi anseye nou pou nou priye an prive, Jezi li menm te pratike sa ke li anseye a. Nan **Matye 14:23**, nou li:

« Lè li fin voye yo ale, li moute pou kont li sou yon ti mòn pou l' lapriyè. Solèy te fin kouche, li te la toujou pou kont li. »

Nan **Matye 26:36 ak 39**, nou li:

« Apre sa, Jezi ale ak disip yo yon kote yo rele Jetsemane. Li di yo: Chita la. Mwen menm, mwen pral lapriyè **pi lwen**. li al yon ti kras **pi lwen**, li lage kò l'fas atè, li lapriyè konsa: O Papa mwen. Si sa te ka fèt, wete gode soufrans sa a devan je mwen. Men, se sa ou vle a ki pou fèt, pa sa mwen vle a. »

Nan **Mak 1:35**, nou li:

« Nan granmaten, byen bonè, li pa t'ankò fè klè, Jezi leve, li soti li kite lavil la, **li al yon kote ki pa gen moun. La li t'ap lapriyè.** »

Nan **Mak 6:46**, nou li:

« **Apre li fin ranvwaye yo, li al lapriyè sou yon ti mòn.** »

Nan **Lik 9:18**, nou li:

« Yon jou, Jezi te pou kont li, li t'ap lapriyè. Disip li yo vin jwenn li, li mande yo: Ki moun yo di mwen ye? »

Pòl ki konprann enpòtans priyè prive a ekri kretyen Korent yo sou sa, Nan **1 Korint 7:5**, nou li:

« **Piga yonn repouse lòt, esepte si nou te antann nou sou sa pou yon moman pou nou ka lapriyè.** Men apre sa, tounen tounen nou ansanm pou n' viv tankou mari ak madanm. Si nou pa fè l' konsa, nou riske pa ka kontwole kò nou ankò. Lè sa a, n'a ka tonbe pi fasil nan pèlen Satan. »

Remake ke Pòl pa di ke pou youn rete lwen lòt si yo antann yo pou **nepòt ki rezon**; men li di pou nou ka lapriyè paske nap redi li ankò lapriyè se yon bagay ki pèsonèl ant ou menm ak Bondye. Pa genyen anyen ki mal pou yon gwoup moun ap priye ansanm pou yon bagay komen, yon bagay ke tout moun mete dakò pou yo priye pou sa. Men, priyè komen an pa kapab ranplase priyè ke ou fè an prive a.

Pa repeste yon bann pawòl pou gremesi

Nan **Matye 6:9-13**, Jezi fin di disip yo pou yo pa repeste yon bann pawòl pou gremesi epi Jezi di:

« **Men ki jan pou nou lapriyè: Papa nou ki nan syèl la, Nou mande pou yo toujou respekte non ou. vin tabli gouvènman ou, pou yo fè volonte ou sou latè, tankou yo fè l'nan syèl la. Manje nou bezwen an, ban nou l'jodi a. Padonnen tout sa nou fè ki mal, menm jan nou padonnen moun ki fè nou mal. Pa kite nou nan pozisyon pou n' tonbe nan tantasyon, men, delivre nou anba Satan. Paske, se pou ou tout otorite, tout pouvwa ak tout lwanj, depi tout tan ak pou tout tan. Amèn** »

Jezi pat di men kisa pou yo repete lè yap lapriyè. Li pat di tou men sa pou yo repete aprè yo fin priye osinon pou yo fèmen priyè a. Jezi te bay yon egzanp pou montre yo ke li pa repete yon pil pawòl, men li kouvri tout sa ke li te vle di ak Papa li nan priyè sa a. Anpil moun fè pratik pou yo repete priyè sa a kòm si priyè sa a se yon obligasyon ke li ye.

Nan lòt pasaj ki montre priyè ke Jezi fè, nou pa jwenn ke li repete menm priyè sa a. Nan **Jan 17, vèchè 1 a 25**, nou li:

« *Apre Jezi fin pale konsa, li leve je l' anlè nan syèl la, li di: O Papa, lè a rive. Fè yo wè bél pouvwa Ptit la, pou Ptit la ka fè yo wè bél pouvwa ou la tou. Ou te ba l' otorite sou tout moun pou l' te kapab bay tout moun ou ba li yo lavi ki p'ap janm fini an. Lavi ki p'ap janm fini an, se pou yo konnen ou, ou menm ki sèl Bondye tout bon an, ansanm ak moun ou voye a: Jezikri. Mwen te fè yo wè bél pouvwa ou sou tè sa a. Mwen fè tou sa ou te ban m'fè. Koulye a, Papa, ban mwen bél pouvwa devan je ou, menm pouvwa mwen te genyen lè m' te avè ou la depi anvan ou te kreye tout bagay.*

Moun ou te mete apa nan lemonn pou mwen yo, mwen fè yo konnen ki moun ou ye. Se pou ou yo te ye. Se ou menm ki te ban mwen yo. Epi yo kenbe pawòl ou. Koulye a, yo konnen tou sa ou ban mwen se nan men ou yo soti. Paske mwen ba yo pawòl ou te ban mwen an. Yo resevwa li. Yo rekonèt mwen soti tout bon bò kote ou, yo kwè se ou ki voye m' vre. M'ap lapriyè pou yo. Mwen p'ap lapriyè pou moun lemonn yo, men pou moun ou ban mwen yo, paske se pou ou yo ye. Tou sa m' genyen se pou ou, tou sa ou genyen se pou mwen. Pouvwa mwen parèt aklè nan yo. Mwen pa nan lemonn lan ankò. Men yo menm, yo nan lemonn lan toujou. Mwen menm, m'ap vin jwenn ou. Papa, ou menm ki apa, pwoteje yo pa pouvwa non ou, menm non ou te ban mwen an, pou yo ka fè yon sèl menm jan ou fè yon sèl avèk mwen. Pandan m' te la avèk yo, mwen te pwoteje yo ak pouvwa non ou, menm non ou te ban mwen an. Mwen te pwoteje yo: yo yonn pa t' pèdi, esepte nonm ki pou te pèdi a, pou sa ki te ekri nan Liv la rive vre. Koulye a, m'ap vin jwenn ou. M'ap pale konsa pandan m' sou latè a, pou jan kè m' kontan an se konsa pou kè yo ka kontan tou nèt ale. Mwen te ba yo pawòl ou; lemonn rayi yo paske yo menm yo pa moun lemonn, menm jan mwen menm mwen pa moun lemonn. Mwen pa mande ou pou wete yo nan lemonn lan, men pou ou pwoteje yo anba Satan. Yo pa moun lemonn, menm jan mwen pa moun lemonn. Fè yo viv pou ou nèt gremesi verite a. Pawòl ou se verite a. Mwen voye yo nan lemonn lan menm jan ou te voye m' nan lemonn lan. Se pou yo m'ap viv jan ou vle l' la, pou yo menm tou yo ka viv jan ou vle l' la, gremesi verite a.

Se pa pou yo sèlman m'ap lapriyè, men pou tout moun ki va mete konfyans yo nan mwen lè y'a tandé mesaj la. M'ap lapriyè pou yo tout fè yon sèl. Papa, se pou yo

tout fè yonn ansanm ak nou, menm jan ou menm ou nan mwen, mwen menm mwen nan ou. Se pou yo tout fè yon sèl pou moun ki nan lemonn yo ka kwè se ou ki te voye mwen. Mwen te ba yo menm pouvwa ou te ban mwen an, pou yo tout te ka fè yonn menm jan ou fè yon sèl avè m' tou: mwen nan yo, ou nan mwen, pou yo tout fè yon sèl nèt ale, pou moun ki nan lemonn yo ka rive rekonèt se ou ki te voye m', pou yo ka rive konnen ou renmen yo menm jan ou renmen m' lan. Papa, se ou ki te ban mwen yo. Mwen ta vle pou yo toujou avè m' kote m' prale a, pou yo ka wè pouvwa mwen, pouvwa ou te ban mwen an, paske ou te renmen m' depi lontan anvan ou te kreye tout bagay. O Papa, ou menm ki fè tout bagay byen, moun ki nan lemonn yo pa konnen ou. Men mwen menm, mwen konnen ou. Moun sa yo konnen se ou ki te voye mwen. Mwen te fè yo konnen ki moun ou ye. M'ap kontinye fè sa toujou, pou kalite renmen ou gen pou mwen an ka nan yo, pou mwen menm mwen ka nan yo tou. »

Nan vèsè 1 a 5, Jezi priye pou tèt li; apre sa, li priye pou disip yo nan vèsè 6 a 19; epi nan vèsè 20 a 25, li priye pou moun ki genyen pou asepte li nan le fiti tankou nou menm kounye a.

Konsa, repete « Notre Père » chak fwa ou priye pa vrèman nesesè. Okontrè, li menm ale kont sa ke Bib la anseye nou. Si nou gade nan **Efèz 1:6-7, nou li:**

« Se poutèt sa, ann toujou fè lwanj Bondye pou bél favè sa a li fè nou kado, gremesi Ptit li renmen anpil la! Gremesi Kris ki mouri pou nou an, nou delivre, nou resevwa padon pou peche nou yo; Bondye fè nou wè jan li renmen nou anpil. »

Sak fè nou resevwa padon pou peche nou? Se gras a Jezi ki te mouri pou nou. Ou pa fè anyen pou ou merite padon pou peche ou yo. Ankò nan **Kolòs 1:13-15, nou li:**

« Li rache nou anba pouvwa fènwa a, li fè nou antre nan peyi kote Ptit li renmen anpil la wa. Se gremesi Ptit sa a nou delivre, nou resevwa padon pou peche nou yo. »

Men si ke ou konnen ke peche ou yo padone gras a Jezi ki te peye dèt peche yo pou ou, poukisa pou ou al repete: « **Padonnen tout sa nou fè ki mal, menm jan nou padonnen moun ki fè nou mal.** »

Pa blyie sa Jezi te di disip yo lè li te fin montre yo kouman pou yo priye. Nan vèsè 14 ak 15, nou li:

« Si nou padonnen moun lè yo fè nou mal, Papa nou ki nan syèl la va padonnen nou tou. Men, si nou pa padonnen moun lè yo fè nou mal, Papa nou p'ap padonnen peche nou yo non plis »

Genyen yon kondisyon pou padon an la a paske Jezi tap anseye disip yo anba lalwa paske Jezi pat ankò mouri pou gras la te kouvri yo. Kounye a, nou pap padonnen moun pou peche pa nou yo kapab padonnen tou, men nap padonnen lòt moun paske nou gen tan jwenn padon déjà. Se sa menm ke Pòl ekri nan **Kolòs 3:12-13** ki li:

« *Nou tout nou fè pati pèp Bondye a: se li menm ki te renmen nou, ki te chwazi nou pou n' ka viv pou li. Se poutèt sa, se pou nou gen kè sansib anpil, pou n' aji byen yonn ak lòt, san lògèy, avèk anpil dousè, anpil pasyans. Se pou nou yonn sipòte lòt, pou nou yonn padonnen lòt si nou gen kont yonn ak lòt. Wi, se pou yonn padonnen lòt, menm jan Kris la te padonnen nou.* »

Nan **1 Jan 2:11-13**, nou li:

« *Timoun mwen yo, m'ap ekri nou paske Bondye padonnen peche nou yo poutèt Jezikri.* »

Si nou gade pawòl pwofèt yo ki tap viv anba lalwa, se yon lòt bagay nèt. Nan **Jeremi 18:23**, nou li:

« *Men ou menm, Seyè, ou konnen tout konplo y'ap fè pou touye m'. Pa padonnen mechanste yo. Pa janm padonnen peche yo. Se pou yo tonbe atè la devan je ou. Lè ou an kòlè, regle yo.* »

Nan **Ezayi 2:8-10**, nou li:

« *Peyi a plen zidòl. Y'ap sèvi bagay yo fè ak men yo, bagay yo bay fòm ak dwèt yo. Tout moun pral bese je yo gade atè afòs yo pral wont. Pa padonnen yo, Seyè! Yo pral kache kò yo nan twou wòch. Yo pral fouye twou anba tè pou yo chape anba kòlè Seyè a. Sezisman va pran yo lè y'a wè Seyè a. Y'a kouri al kache lè pouvwa li va parèt aklè.* »

*** Nou padonnen lòt moun, men se Bondye sèl ki padonnen peche!!!

PRIYE DISIP YO

« *Lè disip yo tandé sa, yo tout mete tèt ansanm pou lapriyè Bondye konsa: O Mèt, se ou menm ki fè syèl la, tè a, lanmè a ak tout sa ki ladan yo. Pa pouvwa Sentespri, se ou menm ki te pale nan bouch sèvitè ou, David, zansèt nou, lè l' te di: Poukisa moun lòt nasyon yo t'ap toumante kò yo konsa? Poukisa pèp yo t'ap fè plan ki p'ap sèvi yo anyen konsa? Wa latè yo pran pozisyon, chèf yo mete tèt yo ansanm sou do Bondye ak sou do Moun li chwazi a! Se sa menm ki rive nan lavil sa a lè Ewòd ak Pons Pilat mete tèt yo ansanm ak moun lòt nasyon yo ak tout moun pèp Izrayèl la*

sou do Jezi, sèvitè ki t'ap viv pou ou a, moun ou te chwazi a. Yo fè tou sa ou menm, nan tout pouvwa ou ak pwòp volonte ou, ou te deside davans ki pou te fèt la. Koulye a, Bondye, gade ki jan y'ap fè nou menas. Bay sèvitè ou yo fòs pou yo ka fè konnen mesaj ou a avèk konviksyon. Lonje men ou pou yo ka fè gerizon, mirak ak lòt bèle bagay nan non Jezi, sèvitè ki te viv pou ou a. Lè yo fin lapriyè, kote yo te ye a pran tranble. Yo tout te anba pouvwa Sentespri, epi yo pran anonse pawòl Bondye a avèk konviksyon.»(Travay 4:24-31)

SIJÈ PRIYÈ PÒL

« Anmenmtan, lapriyè pou mwen tou, pou Bondye ban m' okazyon pou m' fè konnen pawòl li a, pou m' fè lèzòm konnen sekrè Kris la. Se poutèt sekrè sa a menm mwen nan prizon koulye a. Lapriyè pou m' ka rive fè lèzòm wè l' aklè, pou m' ka pale jan mwen dwe pale a. » (Kolòs 4:3-4)

« Se poutèt sa, mwen p'ap janm sispann lapriyè pou nou. M'ap mande Bondye pou l' ede nou pou nou viv yon jan ki dakò ak lavi li mande nou pou nou viv la. M'ap mande l' pou li ban nou pouvwa li, pou nou ka fè tout byen nou vle fè, pou nou fin reyalize nèt travay n'ap fè ak konfyans nan Bondye. Konsa, tout moun va fè lwanj non Jezi a poutèt nou. Nou menm tou, y'a fè lwanj nou poutèt li, gremesi favè Bondye nou an ansanm ak Jezikri, Seyè a, fè nou. »(2 Tesalonik 1:11-12)

« Pou konmanse, m'ap mande pou nou lapriyè Bondye pou tout moun. Fè l' tout kalite demann pou yo, mande l' padon pou yo, di l' mèsi pou yo. Se pou nou lapriyè pou chèf yo ak tout lòt moun ki gen otorite nan men yo, pou nou ka viv trankil ak kè poze nan sèvis Bondye a, ak yon konpòtman ki respektab sou tout pwen. Se bagay konsa ki byen, ki fè Bondye, Sovè nou an, plezi. Li ta renmen wè tout moun sove, li ta renmen wè tout moun rive konn verite a. »(1 Timote 2: 1-4)

7

DENOMINASYON

Daprè Seminè Teyolojik Gordon-Conwell, te genyen environ 39.000 denominasyon kretyen nan lemonn nan ane 2008. Nan ane 1800, te genyen environ 500 denominasyon kretyen. Non sèlman nou pap kapab pale de yo tout, men nou pap menm kapab rive bay non chak denominasyon sa yo. Nou ta renmen pale sou denominasyon ki majè nan peyi dayiti osinon ki ap pran pye nan peyi a kounye a.

Si nou ta fè yon retou nan nesans Legliz nan jou Pannkòt la, denominasyon sa yo pat ekziste. Jezi te grandi nan reliyon Jidayis la, ki se reliyon jwif la ke pèp Izrayèl la te obsèv. Nan reliyon jwif la, genyen 2 gwoup ke nou jwenn nan Bib la, se gwoup Farizyen yo ak gwoup sadiseyen yo. Nan gwoup Farizyen, yo fè konnen ke te genyen 3 denominasyon majè nan mitan yo.

Lè Legliz pran nesans, yo te konsidere li kòm yon gwoup nan reliyon jwif la paske tout lidè yo te leve nan reliyon jwif la. Pòl ekri nan **Galat 1: 13 a 14:**

« Nou tande pale sa m' te konn fè nan tan lontan, lè m' te nan reliyon jwif yo. Nou konnen jan m' te san pitye lè m' t'ap pèsèkite legliz Bondye a, jan m' t'ap chache kraze li. Nan reliyon jwif yo mwen te pi fò pase anpil moun nan ras mwen ki te menm laj avè mwen. Mwen te pi cho pase yo pou defann koutim zansèt nou yo. »

Nan **Travay 24:5**, nou jwenn ke yo te di ke Pòl se te **chèf sèk nazareyen** yo osinon gwoup nazareyen yo paske yo te toujou konsidere legliz kòm yon sèk ki sòti nan reliyon Jidayis la.

Daprè **Travay 11:26**, premyè fwa ke yo te rele disip yo **kretyen** se te nan lavil Antiòch. Pat genyen katolik, pwotesan, batis, pannkotis, temwen Jerova, advantis, etc..nan epòk legliz primitiv. Baz santral legliz te nan Jerizalèm; men nan ane 70, lame women an te detwi lavil Jerizalèm. Piske Jerizalèm kraze, baz la pat kapab rete nan plas sa a ankò. Anplis, legliz te genyen anpil pèsèkisyón e anpil nan ansyen yo te rive menm mouri. Legliz te kontinye genyen pèsèkisyón, men kretyen te kenbe fèm malgre ke anpil te mouri pou lafwa yo nan Jezi.

Gwo bagay ki te vin rive nan istwa legliz se te swadizan konvèsyon anperè Konstanten ki tap gouvène wayòm women an. Nan ane 313, yo te deklare legliz legal epi nan ane 380, yo te deklare legliz kòm reliyon ofisyèl nan wayòm women an. Mo “ katolik ” la vle di inivèsèl. Nou kapab di ke se la ke legliz katolik women an pran nesans. Men legliz katolik vle fè konprann ke se legliz katolik ke Jezi te kite sou latè; sa se pa vre paske anpil nan doktrin legliz katolik yo pa sòti nan Bib la. Nou kapab menm di ke anpil doktrin yo ale kont sa Bib la anseye.

Nou kapab jwenn plis detay sou reliyon katolik la nan liv ke nou te itilize pou ane 2010 la lè nou tap etidye sou sijè legliz la.

Doktrin Legliz Katolik

Otorite Pap la

Legliz Katolik fè konnen ke Pyè se te premye pap la e legliz Jezi a bati sou Pyè menm. Yo itilize **Matye 16: 15-19** pou doktrin sa a ki di:

« *Li di yo: Bon, nou menm, ki moun nou di mwen ye? Simon Pyè reponn: Ou se Kris la, Ptit Bondye vivan an. Lè sa a, Jezi di li: Ou wè ou menm, Simon, ptit Jan an, ou se yon nom Bondye beni. Paske, se pa moun ki fè ou konn verite sa a. Men, se Papa m' ki nan syèl la ki fè sa pou ou. Mwen menm, men sa m'ap di ou: Ou se yon wòch, Pyè. Se sou wòch sa a m'ap bati legliz mwen. Ata lanmò p'ap kapab fè l' anyen. M'ap ba ou kle Peyi Wa ki nan syèl la. Tou sa ou va defann moun fè sou latè, yo p'ap kapab fè l' nan syèl la non plis. Tou sa ou va pèmèt moun fè sou latè, y'a kapab fè l' nan syèl la tou. »*

An nou gade sa Pyè di nan 1 Pyè 2: 4-6:

« *Pwoche vin jwenn Seyè a, li menm ki wòch vivan an. Moun te voye li jete paske pou yo li te san valè. Men, li gen anpil valè pou Bondye ki te chwazi li. Nou menm tou, tankou wòch vivan, kite Bondye sèvi ak nou pou bati kay li a ak pouvwa Sentespri, pou nou ka sèvi l' tankou prêt k'ap viv pou li. Konsa, gremesi Jezikri, n'a ofri bay Bondye ofrann ki soti nan kè nou, ofrann ki pou fè l' plezi. Se poutèt sa nou jwenn sa ekri nan Liv la: Men li, mwen mete yon wòch nan mitan peyi Siyon, yon wòch kwen mwen menm mwen chwazi epi ki gen anpil valè. Moun ki mete konfyans yo nan li p'ap janm soti wont.*

Pou nou menm ki mete konfyans nou nan wòch la, wòch la gen anpil valè. Men, pou moun ki pa mete konfyans yo nan li, sa ki ekri nan Liv la pral rive vre: Wòch moun ki t'ap bati yo te voye jete a, se li menm ki tounen wòch ki kenbe kay la. Se yon wòch k'ap fè moun bite, yon gwo wòch k'ap fè yo tonbe. Yo bite, paske yo pa koute pawòl la. Enben, se sa ki te sere pou yo. »

Nan Ezayi 26:4, nou li:

« *Confiez-vous en l'Éternel à perpétuité, Car l'Éternel, l'Éternel est le rocher des siècles. »*

« *Mete konfyans nou nan Bondye pou tout tan paske Seyè a ap toujou la pou pwoteje nou.»*

Pòl ekri nan Efèz 2: 20

« *Nou menm moun lòt nasyon yo, nou se kay Bondye ap bati sou fondasyon apòt yo ak pwofèt yo te poze a, men se Jezikri menm ki gwo wòch ki kenbe kay la kanpe a.* »

Legliz pa bati sou Pyè, legliz Jezi a bati sou Jezikri li menm menm!!!

Sen Nan Legliz Katolik

Yo anseye ke sen yo la pou entèsede pou yo, men yo pa priye devan sen yo. Nan **1 Timote 2:5**, nou li:

« *Car il y a un seul Dieu, et aussi un seul médiateur entre Dieu et les hommes, Jésus Christ homme* »

« *Se yon sèl Bondye a ki genyen. Se yon sèl moun tou ki mete lèzòm dakò ak Bondye ankò, se Jezi, Kris la* »

Tout sen ke moun legliz katolik ap pale avè yo a, se yon seri de moun ki mouri ke yo ye. Nan **Deteronòm 18: 11-12**, nou li:

« *Piga gen nan mitan nou moun k'ap sèvi ak cham, moun ki pral nan tab tounant, k'ap vizite moun ki konn tire kat, ak moun k'ap rele mò pou pale ak yo. Paske Seyè a pa vle wè moun k'ap fè bagay sa yo. Epitou, se paske moun lòt nasyon yo t'ap fè tout vye bagay sa yo kifè Seyè a, Bondye nou an, te mete yo deyò pou nou ka pran plas yo.* »



Tradisyon legliz katolik anseye ke Mari te monte nan syèl tou vivan; men pa genyen okenn prèv ke sa te fèt vre. Nan **Jan 3:13**, nou li:

« *Pesonn pa janm moute nan syèl la, esepte Moun Bondye voye nan lachè a ki desann soti nan syèl la.* »

***Jenèz 5:24, Ebre 11:5

Legliz katolik anseye ke Mari te rete vyèj pou tout lavi li, men nan Matye 12: 46:

« *Jezi t'ap pale ak foul moun yo toujou lè manman l' ak frè l' yo vin rive. Yo rete deyò, yo t'ap chache yon jan pou yo te pale avè l'.* »

Nan Mak 6:2-3, nou li:

« *Lè jou repo a rive, li kòmanse moutre moun ki te nan sinagòg la anpil bagay. Foul moun ki t'ap koute l' yo te sezi anpil, yo t'ap di konsa: -Kote l' jwenn tout bagay sa yo? Kilès ki ba l' konesans sa yo? Kouman li fè fè tout mirak sa yo? Se pa ti bòs chapant pitit Mari a? Se pa frè Jak, Jòz, Jid ak Simon an? Apa tout sè l' yo la avèk nou? Se sa ki fè li te tounen pou yo yon okazyon tonbe nan peche.* »

Legliz Literyen

Denominasyon sa a pran nesans li ak Martin Luther nan ane 1500 yo. Nou jwenn anpil moun ki nan denominasyon sa a nan peyi Almay. Youn nan doktrin ki bay pwoblèm nan denominasyon sa a, se batèm. Yo fè batèm ni pou ti bebe jan katolik yo fè li a, ni pou granmoun ki vle antre nan reliyion yo an. Yo pa kwè ke batèm nan genyen okenn relasyon avèk sali a. **Nan Travay 2:38**, nou li:

« *Pyè reponn yo: Tounen vin jwenn Bondye, epi yonn apre lòt vin resevwa batèm nan non Jezikri, pou Bondye padonnen tout peche nou yo. Apre sa, n'a resevwa Sentespri, kado Bondye a.* »

Temwen Jerova

Temwen Jerova yo te kòmanse nan environ ane 1870 yo lè ke Charles Taze Russell te kòmanse yon etid biblik lakay li nan Allegheny, Pa. Yo te rele tèt yo Etidyan Labib. Nan ane 1884, yo fòme gwoup Sosyete Watchtower ki dirije sèk Temwen Jerova a. Gwoup sa a genyen anpil doktrin ki pa genyen anyen a wè ak Pawòl Bondye a. Yo ititlize 2 ti liv ki sòti 2 fwa pa mwa. Premye liv la se « Reveillez-vous » ki dirije plis pou moun ki pa fè pati de gwoup sa a epi ki pale de nouvèl ak bagay kap pase nan lemonn. Dezyèm liv la se « La tour de garde » ki dirije plis ak manm gwoup la e ki pale sou doktrin ak pratik gwoup sa a. Men kèk bagay ke yo anseye:

Se sèlman Sosyete Watchtower ke Bondye bay dwa pou entèprete bib la. Pèsonn pa genyen dwa entèprete pawòl ki nan bib la pou kont yo.

Trinite a pa egziste, se yon doktrin satanik ki anseye ke genyen 3 bondye.


Jezikri se te akanjel Michel anvan ke li te vin moun.

Jezi se « yon ti dye » ki pi piti pase Jerova.

Nap tounen « yon ti dye » tou lè nou jwenn Jezi nan syèl la

Pa genyen lanfè; tout moun pèdi yo pap egziste ankò, Bondye ap disparèt yo.

Denominasyon Batis



Denominasyon Batis la pran nesans nan ane 1609 – 1610 nan peyi Laolann. Nan ane 1606, yon bichòp Legliz Angleterre ki rele John Smyth ki te pran tan pou li te etidye nouvo testaman an te vin fini pa konprann ke doktrin ak praktik Legliz Angleterre a pat biblik. Li demisyone epi li kite legliz la. Lè Legliz la te kòmanse pèsekite misye, li sove, li ale Laolann. John ansanm ak 37 lòt moun fòme Premye Legliz Batis Anglè nan peyi Laolann. Aprè lanmò misye an 1612, kèk gressnanmoun ki te avèk John yo tounen an Angleterre paske te genyen mwens pèsekisyon epi yo fòme diferan gwoup batis ki pat anba menm banyè a.

Doktrin Legliz Batis

Anba denominasyon Batis la, nou jwenn anpil gwoup ki pa wè tout bagay yo menm jan, men sa ki mete yo anba denominasyon batis la, se yon seri de doktrin ki baz pou yo, pa egzanp:

Kontrèman ak Legliz Katolik, Legliz Batis pa batize ti bebe, yo batize moun ki kwè nan Jezi.

Batem fèt lè ou plonje nan dlo, pa lè yo vide dlo sou tèt ou.

Jistifikasyon pa la fwa, ou pa sove avèk zèv osinon travay ou.

Se 2 pozisyon ministè ki rekonèt: pastè ak dyak.

Tout manm genyen dwa pou ale devan Bondye, ou pa bezwen ale kote yon prèt osinon yon sakrifikatè pou ou ale devan Bondye.

Legliz Pannkotis

Kontrèman ak sa kèk moun di, denominasyon Pannkotis la pa kòmanse nan ane 33, nan jou pannkot la. Se yon mouvman ki kòmanse nan ane 1901 epi ki vin pran pye nan ane 1906. Sa ki kle nan denominasyon sa a, se pale an lang. Yo anseye ke pale an lang se prèv ke ou resevwa Sentespri. Daprè doktrin yo an, si ou pa pale an lang, ou pa genyen Sentespri nan lavi ou.

Sa vin lakoz ke anpil ladan yo oblige ap priye pou yo pale an lang paske si yo pa pale an lang, genyen yon bagay nan lavi yo ki anpeche Sentespri nan lavi yo. Genyen kèk asanble ki menm rive fè lekòl pou anseye moun yo kòman pou yo pale an lang. Tankou tout lòt denominasyon yo, yon asanble gen dwa fè yon bagay ke yon lòt asanble pa fè, men se pale lang lan ki mete yo anba menm banyè a.

Genyen diferans nan mitan denominasyon sa a nan jan ke yon gwoup gen dwa anseye yon bagay epi yon lòt gwoup pa anseye li menm jan an. United Pentecostal Church (Legliz Pannkotis Ini) ekri nan liv “Articles de la foi”

Genyen yon sèl Bondye ki manifeste li an twa. Yo pa dakò ke genyen twa pèsòn men ki fè yon sèl.

Yo anseye tou ke batèm se yon nesesite pou sove; sa vle di ke san batèm, yon moun pa kapab sove. Anplis, se nan non Jezi pou yon moun batize, si se pa sa, moun sa a pral nan lanfè.

Yo anseye tou si ou pa pale an lang, sa vle di ke ou pa genyen Sentespri nan ou menm; konsa ou pral nan lanfè.

Genyen anpil bagay tou ki pa ekri men ki anseye nan gwoup sa a tankou:

Genyen ki pa dakò pou mete okenn bijou, menm bag maryaj; si ou mete bijou ou pral nan lanfè. Nan mitan menm gwoup sa a, genyen ki dakò pou mete yon bag maryaj.

Gason pa sipoze genyen cheve long ni bab; genyen ki bay ki mezi ke yon wòb ki sou yon fanm sipoze ye.

Legliz Advantis

Denominasyon Advantis la pran nesans avèk yon nomm ki rele William Miller. Misye te asepte Jezi epi li tap travay nan yon legliz batis. Nan etidye Bib la, William santi ke li jwenn kle yon bann bagay nan Bib la tankou lè ke Jezi ap tounen ak lafen dimonn. Misye kòmanse preche sou bagay sa yo epi li ekri liv ki fè konnen ke Jezi ap tounen nan ane 1843.

Nan Danyèl 8:14 ki di:

« *Et il me dit: Deux mille trois cents soirs et matins; puis le sanctuaire sera purifié.* »

« *Lòt zanj lan reponn: -Se pou nou tann mil sansenkant (1150) jou ankò pase anvan yo rekomanse ak ofrann bêt pou Bondye yo. Se lè sa a Bondye va rebati tanp li a ankò.* »

Misye te entèprete 2300 jou sa yo kòm 2300 ane; li konte de ane 457 BC, li ajoute 2300 ane yo epi li jwenn ane 1843. Men Jezi pat tounen. Yon lòt nomm ki rele Samuel Snow ki te travay ansanm ak William te itilize Abakouk 2:3 pou li mete yon lòt 7 mwa ak 10 jou sou dat anvan di ke Jezi ap tounen 22 Oktòk 1844. Men Jezi pat tounen.

Anpil moun te kite gwooup la; moun ki te nan gwooup la te rele tèt yo Advantis. Le 21 Me 1863, Ellen White ansanm ak yon gwooup batis, metodis, presibiteryen te fòme ofisyèlman denominasyon ki rele: Advantis Setyèm Jou. Ellen te fè konnen ke prediksyon ane 1844 te kòrèk men se pat retou Jezi ke li te ye, se te pito kòmansman jijman Jezi a epi Jezi ap tounen tout swit aprè.

Doktrin ak kwayans yo

Yo kwè nan anpil menm bagay ke lòt denominasyon yo kwè; men diferans ke yo genyen sè ke yo konsidere Ellen White kòm yon moun ki te genyen don pwofèt. Konsa, yo kontinye itilize liv ke Ellen te ekri yo kòm yon sous verite pou konfòte, gide, enstwi e korije legliz.

Yo kwè ke moun ki asepte Jezi genyen lavi etènèl e yap genyen pou yo viv etènèlman e moun ki pa asepte Jezi yo genyen pou yo detwi. Yo pa kwè nan zafè ale viv nan syèl ni yo pa kwè nan egzistans lanfè.

Yo kwè tou Sali a depann sou konfyans nan Jezi ansanm ak travay moun nan. Depi 1844, genyen yon jijman kap fèt nan syèl la kote ke Jezi genyen Liv Lavi a (Apokalips 5) nan men Li pou Li determine ki moun ki sove ak ki moun ki pèdi.

Edikasyon (moun ki fè gwo klas) se yon bagay ke yo respekte anpil, yo ankouraje manm yo pou yo kenbe lekòl fèm. Wap jwenn anpil moun ki fè gwo klas nan denominasyon sa a.

Yo pa asepte pou yon advantis marye ak yon moun ki pa advantis daprè 2 Korent 6:14.

Doktrin ke yo rekonèt plis pou li, se zafè Saba a. Kòmanse Vandredi swa pou rive Samdi swa, yo obsève Saba menm jan reliyon Jidayis la te konn fè anba lalwa. Yo anseye ke lwa Bondye a pa chanje e ke katriyèm kòmannman an mande pou yo fè sa. Lòt doktrin ke yo anseye tou se zafè manje ke yo pa gen dwa manje vyann kochon ak lòt manje ki entèdi nan liv Levitik.

Legliz Sen Nan Dènye Tan

Gwooup sa a pran nesans yo nan Etazini nan ane 1820 yo. Nonm ki kòmanse gwooup sa a rele Joseph Smith. Misye fè konnen ke depi lè li te timoun, li te wè Papa Bondye ak Jezi ki te di li ke legliz te pèdi wout li e se a travè li menm ke bondye pral mete legliz nan plas li ankò. Joseph ak yon lòt nonm ki rele Oliver Cowdery fè konnen ke 4 zanj te vizite yo nan ane 1829 pou bay mesye yo otorite pou re-establi Legliz Jezi a. Nan ane 1844, aprè yon gwooup moun te asasine Joseph Smith, yo vin divize an plizyè gwooup paske te genyen batay nan mitan yo pou konnen kilès ki pou ranplase Smith. Anpil nan manm yo te swiv yon nonm yo rele Brigham Young.

Lè yo te pran nesans, yo te pratike sa ke yo rele poligami, sa vle di you gason kapab genyen plizyè madanm; men nan tan ke nap viv la a, genyen yon gwooup ladan yo ki kontinye pratike poligami men la plipa ladan yo pa pratike sa ankò. Apa de Bib la yo genyen Liv Mòmon an ki enpòtan pou gwooup sa a. Se yon liv ke Joseph Smith di ke li resevwa nan men yon zanj ki sòti nan

syèl.

Doktrin ak kwayans yo

Yo kwè ke apa de Legliz yo a, pa genyen okenn lòt denominasyon osinon reliyon ki fè pati de Legliz Jezi a vre.

Yo anseye tou ke avan ou te vin nan vant manman, se te nan syèl la ou tap viv ap Bondye ki se papa ou; Bondye genyen yon madanm ki se manman ou; sa vle di ke tout moun sou latè, se yon bann ti bondye.

Yo anseye ke pa genyen lanfè, tank ou fè bon bagay sou latè, se plis pouvwa ke ou pral genyen lè ou rive nan syèl la.

Legliz Metodis

Denominasyon Metodis la te pran nesans li avèk 2 frè ki te rele John Wesley ak Charles Wesley. Mesye sa yo te lekòl nan yon inivèsite ki te rele Oxford University e yo te òganize yo ak yon gwooup elèv pou yo etidye Bib la. Yo te anplwaye yon sòt de metòd pou etidye Bib la; konsa pou pase yo nan rizib, moun te konn rele yo metodid oksfòd. Se konsa non metodis la tou rete pou gwooup sa a. Mesye sa yo te zèle pou preche Levanjil ak prizonye, moun ki pòv, moun ke sosyete a te rejete.

John te asepte Jezi lè li te tandé Martin Luther ki te fè yon ekspoze sou sove pa la fwa nan ane 1738. Lè Legliz Angletè entèdi mesye yo preche nan asanble yo, mesye yo pran preche nan lari ak lakay moun. John te plis nan preche epi Charles te konn ekri mizik. Yo fè konnen ke John te konn preche environ 500 mesaj chak ane epi Charles ekri plis ke 6000 chante levanjil.

A tout ke mesye yo pat genyen plan pou yo te fè yon asanble apa, anpil moun te vin ap swiv yo. Nan ane 1739, yo ekri yon seri de règ ak mach a swiv ke yo te rele "Atik Relijyon" ke jiska prezan anpil asanble metodis itilize. Tankou lòt denominasyon yo, genyen divizyon nan mitan yo tankou yon branch ki te Legliz Metodis Afriken ki te fòme akoz de pwoblèm rasyal ki te egziste nan mitan yo. Moun nwa pat kapab chita nan menm chanm ak moun blan nan sèvis yo, konsa yon nomm ki te Richard Allen nan Filadèlfia ansanm ak lòt lidè nwa separe yo de blan yo, men yo kenbe menm doktrin metodis la yo.

Doktrin ak kwayans yo

Yo anseye ke yon moun kapab pèdi sali a si li rejete Jezi volontèman.

Yo anseye tou ke yon moun kapab rive vin bon nèt pou li vin san peche ki kontrè ak sa ke1 Jan 1:8-10 di.

Yo batize ni gramoun, ni timoun ak sistèm lage dlo sou tèt ak figi moun nan.

Daprè rechèch ki fèt, 30 poustan nan lidè yo pa kwè ke Jezi se Bondye; 60 poustan pa kwè nan nesans Jezi a travè yon fanm vyèj; 50 poustan pa kwè ke Jezi te leve vivan ak kò li tout bon vre.

Anplis, malgre ke doktrin yo pa dakò sou tout pwen ak Legliz Katolik, yo genyen yon bon relasyon ak Legliz Katolik Women an. Nan ane 1982, Bichòp Metodis William Cannon te fè Pap la konnen ke 2 legliz sa yo genyen plis bagay an komen ke bagay ki separe yo.

Men kèk gzanp nan diferan gwoup ki anba menm denominasyon an men ki pa wè tout bagay yo menm jan:

Katolik- 1.2 billion

Breakaway Catholic Churches - 25 million
Apostolic Catholic Church - 8 million
Philippine Independent Church - 6 million
Chinese Patriotic Catholic Association - 5 million
Brazilian Catholic Apostolic Church - 5 million
Old Catholic Church - 0.6 million
Society of St. Pius X - 0.5 million

Batis- 100 million

Southern Baptist Convention - 16.3 million
National Baptist Convention, USA, Inc. - 8.5 million
National Baptist Convention of America, Inc. - 3.1 million
Nigerian Baptist Convention - 2.5 million
Progressive National Baptist Convention - 2.5 million
Baptist General Convention of Texas - 2.3 million
Baptist Union of Uganda - 1.5 million
American Baptist Churches USA - 1.4 million
Brazilian Baptist Convention - 1.3 million
Baptist Bible Fellowship International - 1.2 million
Baptist Community of the Congo River - 1 million
National Primitive Baptist Convention of the U.S.A. - 1 million
National Missionary Baptist Convention of America - 1 million
Myanmar Baptist Convention - 0.9 million
Samavesam of Telugu Baptist Churches - 0.8 million
Korea Baptist Convention - 0.8 million
Baptist Convention of Kenya - 0.8 million
Myanmar Baptist Convention - 0.7 million
Council of Baptist Churches in Northeast India - 0.6 million
Cooperative Baptist Fellowship - 0.5 million
Nagaland Baptist Church Council - 0.5 million
Baptist Convention in Tanzania - 0.5 million

Orissa Evangelical Baptist Crusade - 0.5 million
Baptist General Association of Virginia - 0.5 million
National Baptist Convention (Brazil) - 0.4 million
Church of Christ in Congo–Baptist Community of Congo - 0.4 million
Convention of Philippine Baptist Churches - 0.3
American Baptist Association - 0.3 million
Union of Baptist Churches in Rwanda - 0.3 million
Association of Baptist Churches in Rwanda - 0.3 million
Garo Baptist Convention - 0.2 million
Baptist Community of Western Congo - 0.2 million
Baptist Missionary Association of America - 0.2 million
Conservative Baptist Association of America - 0.2 million
National Association of Free Will Baptists - 0.2 million
Canadian Baptist Ministries - 0.2 million
National Baptist Convention of Mexico - 0.2 million
Manipur Baptist Convention - 0.2 million
Convention of Baptist Churches of the Northern Circars - 0.2 million
Baptist Community in Central Africa - 0.2 million
Baptist Convention of Malawi - 0.2 million

Pannkotis- 130 million

Assemblies of God - 60 million
International Circle of Faith - 11 million
The Pentecostal Mission - 10 million
Church of God (Cleveland, Tennessee)- 9 million
International Church of the Foursquare Gospel - 8 million
Apostolic Church - 6 million
Church of God in Christ - 6.5 million
Apostolic Church - 5.5 million
United Pentecostal Church International - 4 million
Christian Congregation of Brazil - 2.5 million
Universal Church of the Kingdom of God - 2 million
Church of God of Prophecy - 1 million
God is Love Pentecostal Church - 0.8 million

San Denominasyon- 80 million

Calvary Chapel - 25 million
Born Again Movement - 20 million
Association of Vineyard Churches - 15 million
Christian and Missionary Alliance - 4 million
True Jesus Church - 2.5 million
Church of God (Anderson, Indiana) - 1.2 million





